



Terenga 5: Hōtaka 43 – ‘Ki te / Ki te kore e...’

He Mihi

Pākato mai i runga i ngā tai o te moana ki te whakakukūnga o te hunga e aroha nui ana ki te reo Māori. Ko koe tēnā, ko mātou ēnei. Tēnā tātou i roto i tō tātou piringa tahitanga.

Hei Mahi Whakarongo

He rōpū hou kua whakakotahi i ō rātou pūkenga tito, waiata anō hoki hei whakatairanga i te reo Māori mā roto i tētehi huinga waiata e hāngai ana ki ngā kaupapa o ia rā, o ia rā.

Anei ngā pātai hei whakautu mā koutou:

- 1) He aha te kaupapa o te waiata?
- 2) He aha te tikanga o ngā kupu 'Kei muri pea'?
- 3) He aha te tohutohu o roto ?

Kia whakarongo ake tātou ki tēnei o ngā waiata a terōpū o Manea.

He Whakamārama

He rite tonu te rerenga ka tīmata ki ngā pū 'Ki te...' ki te 'Mehemea ka...' (me ngā momo rerenga 'If' e hāngai ana ki te wā heke. Anei ētehi tauira:

- a) Mehemea ka haere koe, ka haere au. = Ki te haere koe, ka haere au.
- e) Mēnā ka kitea, puritia. = Ki te kitea, puritia.
- i) Mehe ka tutuki tēnei, ka harikoa te iwi. = Ki te tutuki tēnei, ka harikoa te iwi.

Anei te huarahi hei whakakāhore i ngā rerenga ka tīmata ki te 'Ki te':

- o) **Ki te** haere koe, ka kitea ngā hua. > **Ki te kore** koe e haere, kāore e kitea ngā hua.
- u) **Ki te** tatari koe, ka ea. > **Ki te kore** koe e tatari, e kore e ea.
- h) **Ki te** heke te ua, ka mākū te iwi. > **Ki te kore** e heke te ua, kāore te iwi e mākū.

He Mahi ĩ-papa

Whakakāhoretia ngā rerenga kei runga i te ĩpapa:

Ki te kōrerotia te reo, ka ora.

Hei Mahi

Panonitia ēnei rerenga kōrero kia tīmata kē ai ki ngā pū 'Ki te...'

1. Mēnā ka tau te waka hei te rua karaka, ka tōmuri tātou.
2. Mehemea ka puta he raruraru, mā wai hei whakatika?

Whakakāhoretia ēnei rerenga kōrero:

3. Ki te rongo koe i te tangi a te ruru, he tohu mate.
4. Ki te tuki tō upoko ki te tuanui, ka mamae.
5. Ki te tuku tātou i te reo kia rere, ka nui ake te mana o te reo.

Whakautu:

Mahi ĩpapa: Ki te kore te reo e kōrerotia, kāore te reo e ora.

1. Ki te tau te waka hei te rua karaka, ka tōmuri tātou.
2. Ki te puta he raruraru, mā wai e whakatika?
3. Ki te kore koe e rongo i te tangi a te ruru, ehara i te tohu mate.
4. Ki te kore tō upoko e tuki ki te tuanui, e kore e mamae.
5. Ki te kore tātou e tuku i te reo kia rere, e kore e nui ake te mana o te reo.